

मार्निंग डोगरी न्यूज़ बुलेटिन, समें. 09.20 Hrs

<><><><><><>

## Headlines

- भारत नै दुनिया भरै च आतंकवाद दे मामले च पाकिस्तान गी बेनकाब करने लेई इक बड्डी पैहल कीती ऐ। बहुदलीय शिष्टमंडल बक्ख-बक्ख खेतरें च जाइयै भारत दा पक्ख रक्खग।
- मंत्री सकीना इतू होरें आखेआ ऐ जे सरकार आसेआ शुरू कीती गेदी “राबिता” पैहल लोकें दी भलाई बेहतरी ते जिम्मेदार शासन गी लेइयै सरकार दी बचनबद्धता दर्शादी ऐ।
- फौज दे उत्तरी कमान अध्यक्ष होरें पुंछ ते राजौरी जिलें च सुरक्षा हालात दा जायजा लैता। पुलस महानिदेशक होरें जम्मू जिले दे बन्ने कन्नै लगदे इलाकें दा दौरा करियै आप्रेशन सिंदूर दौरान पुलस ते बीएसएफ दी भूमिका दी सराहना कीती।
- पुंछ जिले च हालात हून रमानदारी आहले बने देन ते आम जनजीवन रोज ध्याड़े आहला लेखा चलै करदा ऐ।
- ते इक्क हफते दे वक्फे दे बाद आई.पी.एल 2025 दे मैच अज्जै थमां परतियै शुरू होआरदे न। अज्ज बैंगलुरु च रायल चैलेंजर्स बैंगलुरु दा मकाबला कोलकाता नाइट राइडर्स कन्नै होग।

<><><><><><>

## Govt. Delegation

केंद्र सरकार आपरेशन सिंदूर दे मददेनजर पाकिस्तान प्रायोजित आतंकवाद दे खिलाफ भारत दा पक्ख रखने आस्तै बक्ख-बक्ख देशें च बहुदलीय शिष्टमंडल भेजने दा विचार करा रदी ऐ। सूत्रें मूजब हरेक शिष्टमंडल च सत्ताधारी ते विपक्षी पार्टियें दे सांसद शामिल होडन। कांग्रेस दे वरिष्ठ नेता जयराम रमेश होरें नमीं दिल्ली च संवाददाताएं गी दस्सेआ जे संसदीय कार्य मंत्री किरें रिजिजू होरें कांग्रेस अध्यक्ष मल्लिकार्जन खड़गे हुंदे नै इस कूटनीतिक पहल पर गल्लबात कीती ऐ। सरकार दी इस पैहल दा मकसद पाकिस्तान च फल्ला-फुल्ला दे आतंकवाद पर भारत दी स्थिति कन्नै कुल संसारी समुदाय गी अवगत कराना ऐ ते पाकिस्तान किस चाल्ली आतंकवाद गी शैह ते समर्थन देइयै इसी अपनी सरकारी नीति दे तौरा पर इस्तेमाल करै करदा ऐ, इस बारै ओहदा अस्सल चेहरा दुनिया दे सामने आहनना ऐ।

<><><><><><>

## Itoo-Rabita

मुख्यमंत्री हुंदे लोकें तगर पुज्ज बनाने आहले कार्यक्रम “राबिता” दे तैहत सेहत मंत्री सकीना इतू होरें श्रीनगर दे सिविल सचिवालय च बक्ख-बक्ख सार्वजनिक प्रतिनिधिमंडलें कन्नै मलाटी कीती। बक्ख-बक्ख जिलें दे बसनीकें शिड़क संपर्क, सेहत दिक्खभाल, पानी दी सप्लाई ते समाज कल्याण योजनाएं सरबन्धी मुद्दें उन्दे सामने रक्खे। मंत्री होरें इनें मसलें दे समाधान आस्तै तौले कार्रवाई दा वायदा कीता ते जवाबदेह होने दी सरकार दी प्रतिबद्धता गी पक्का कीता। उनें आखेआ जे “राबिता” दा मकसद सरकार ते बसनीकें दे बश्कार छिंडे गी खत्म करना ऐ।

मंत्री होरें लोक कल्याण आस्तै सरकार दे धेड़यै गी बी दोहराया ते गलाया जे वर्तमान प्रशासन सक्रिय रूप कन्नै जनता दी अवाज सुना करदा ऐ ते उंदिएं समस्याएं दा नबेड़ा करा'रदा ऐ।

<><><><><><>

### Dar-Schemes

ग्रामीण विकास ते पंचैती राज मंत्री जावेद अहमद डार होरें सिविल सचिवालय श्रीनगर च इक्क समीक्षा बैठक दौरान ग्रामीण सशक्तिकरण आस्तै सरकार दी बचनबद्धता गी फी पक्का कीता। उनें अधिकारियें गी पी.एम ग्रामीण आवास योजना, पी.एम.ए.वाई-जी, मनरेगा ते होरनें कई योजनाएं गी पारदर्शी तरीके कन्नै लागू करने दा आग्रह कीता। उनें अधिकारियें गी विधायकें दे कन्नै सहयोग कन्नै कम्म करने ते चला'रदी परियोजनाएं च तेजी आहनने दा हुकम दिता। बैठक च दस्सेआ गेआ जे माली बरे 2024-25 च पी.एम.ए.वाई-जी दे तैहत रिकार्ड 1 लख 12 जहार मकान पूरे कीते गे जेड़ा जम्मू-कश्मीर च हुनै तगर दा सब्भनें शा मता बड़डा आंकड़ा ऐ। एहदे अलावा मनरेगा तैहत 4 करोड़ 7 लख 4 जहार ध्याड़ियें आहला रोजगार पैदा कीता गेआ ते 1 लख 84 जहार कम्म पूरे कीते गे जेड़े रोजगार ते ग्राईं बुनियादी ढांचे च महत्वपूर्ण उपलब्धियें गी दर्शादे न। मंत्री होरें जवाबदेही ते समेंसिर सेवा प्रदान करने दे महत्व पर जोर दिता।

<><><><><><>

## Northern Command Visit

फौज दी उत्तरी कमान दे अध्यक्ष लेफ्टिनेंट जनरल प्रतीक शर्मा होरें कल राजौरी ते पुंछ जिले दे बन्ने कन्ने लगदे अगेत्रें इलाकें दा दौरा करियै उत्थे मजूदा सुरक्षा हालात दा जायजा लैता ते फौज दिएं कारवाइएं सरबंधी तैयारिं दी समीक्षा कीती। दौरें दौरान उनें गल्लबात कीती ते हालिया कारवाइएं च उंदे समर्पण भाव ते कामयाबी लेई उंदी मती सराहना बी कीती। लेफ्टिनेंट जनरल शर्मा होरें फौज दे सब्बनं अधिकारिं ते जवानें गी आखेआ जे ओह् अग्गे बी पूरी चाल्ली सौहगे, सतर्क रेइयै अपनी इयूटी अंजाम देन ते ठीक इस्सै चाल्ली अपनी पेशेवराना महारत दा जमायरा करदे रौहन। उनें मुख्यै दी रक्षा ते नागरिकें दी हिफाजत लेई फौज दिएं कारवाइएं सरबंधी तैयारिं दे महत्वै पर लो पांदे होई खिते च रमानदारी ते स्थिरता बनाई रखने च थेआरबंद बलें दी दलेरी ते निष्ठा दी सिफ्त कीती।

<><><><><><>

## DGP-Jammu Visit

जम्मू-कश्मीर दे पुलस महानिदेशक नलिन प्रभात होरें जम्मू जिले दे बन्ने कन्ने लगदे इलाकें दा दौरा लाया ते उत्थे मजूदा सुरक्षा हालात दा जायजा लैता। दौरें दौरान उनें उत्थे तैनात बलें कन्ने गल्लबात बी कीती। पुलसै दे होर बी सीनियर अफसर दौरें दौरान उन्दे कन्ने हे जिनें आर.एस.पुरा, काना चक्क ते अंतरराष्ट्री बन्ने कन्ने लगदे होरनें इलाकें दा बी दौरा कीता।

उनें भारत ते पाकिस्तान बशकार बनी दी तनोतनी आहली हालिया स्थिति दे दौरान जम्मू-कश्मीर पुलस दी तुरत कार्रवाई, टकोहदा करियेँ म्हौल खराब होने दी शेंका गी सेई करदे गेँ बन्ने कन्ने लगदे रिहायशी इलाके खाली कराइयै लोकेँ गी सुरक्षित थाहरें पजाने आहली कार्रवाई दी सराहना कीती।

<><><><><><>

### Poonch-Normalcy

पुंछ जिले च जित्थे पिछले दिनेँ पाकिस्तान दी तरफा सिविल इलाकेँ गी निशाना बनाइयै कीती गेदी बुजदलाना हरकत करी डर-त्राह आहला म्हौल पैदा होई गेदा हा, उत्थै हून बल्लेँ-बल्लेँ रमानदारी ब्हाल होआ करदी ऐ। पुंछ कस्बे च सब्बै बजार खुल्ले न ते रोज ध्याड़े आहला लेखा गतिविधियां चलै करदियां न। उआं प्रशासन नै हालात पर नेइमी तक्क बनाइयै रक्खी दी ऐ ते लोकेँ गी अपील कीती ऐ जे ओह घाबबरन नेई ते शांति बनाई रक्खन। बक्ख-बक्ख समुदाएं दे प्रतिनिधि बी रमानदारी बहाल करने दे जत्नेँ च सहयोग देआ करदे न। कुसै बी चाल्ली ददी माड़ी घटना कोला बचने लेई सुरक्षा बलेँ गी पूरी चाल्ली हाई अलर्ट पर रक्खेआ गेदा ऐ ते प्रशासन दा मुख्क ध्यान टकोदा करियेँ गोलीबारी प्रभावित इलाकेँ च पूरी चाल्ली रमानदारी ते विजन कुसै डर-त्राह आहला म्हौल पूरी चाल्ली कायम करने पर ऐ। तोआई, जम्मू-कश्मीर सरकार दे मंत्री जावेद राणा होरें बी अपने पुंछ दौरे दौरान लोकेँ दी हिम्मत ते दलेरी दी सराहना कीती।

<><><><><><>

## Principal Secy. Poonch

मैहकमा राई-बाई दे प्रधान सचिव शैलेंद्र कुमार होरें पुंछ जिले च हाल च गै बन्ने पारा कीती गेदी गोलाबारी कन्नै प्रभावित परौआरें कन्नै मलाटी कीती। प्रधान सचिव जेड़े के पुंछ दे दौरें पर हे, होरें पीड़ितें कन्नै इक्कजुटता प्रकट कीती ते उनेंगी सरकार दे पूरे समर्थन दा भरोसा दोआया। उनें गोलाबारी च अपनी जान मोहाने आहली इक्क महिला दे परौआर कन्नै मलाटी करने आसतें मनकोट दा बी दौरा कीता। डिप्टी कमिशनर पुंछ, विकास कुंडल होरें प्रधान सचिव गी बहाल कीती गेदी बिजली, पानी ते होरनें जरूरी सेवाएं सने राहत कम्में दे बारे च बी जानकारी दिती।

<><><><><><>

## Udhampur topper

उधमपुर दियां जिला विकास कमिशनर सलोनी राय होरें C.B.S.E ते जम्मू-कश्मीर स्कूली शिक्षा बोर्ड दे 12मीं ते 10मीं दे मतेयानें च शानदार प्रदर्शन करने आहले विद्यार्थिं गी सम्मानित कीता। जिला प्रशासन आसेआ आयोजित इस कार्यक्रम च उनें विद्यार्थियें दे कन्नोकन्नी उन्दे स्कूलें ते टीचरें ते माता-पिता दी बी सराहना कीती जिंदे सांझे जत्नें कन्नै बच्चें गी पढ़ने ते अपनी समर्था दा पूरा-पूरा इस्तेमाल दस्सने दा मौका हासल होआ। इस मौके पर म्तेहानें च अक्वल होने आहले किश विद्यार्थिं अपने तजुर्बे, पढ़ाई करने दे तरीके बी होरनें कन्नै सांझे कीते।

<><><><><><>

## IPL-Restart

इंडियन प्रीमियर लीग .. 2025 इक्क हफ्ते दे वक्फे दे परैंत अज्ज परतियै शुरू होने आहला ऐ जेदे च मेजबान रॉयल चैलंजर्स बेंगलुरु ते कोलकाता नाइट राइडर्स बश्कार एम. चिन्नास्वामी स्टेडियम बेंगलुरु च इक मैच होग। मैच संझा साइडे 7 बजे शुरू होग। एहदे शा पैहले भारत ते पाकिस्तान बश्कार बधदे तनाs दे कारण आई.पी.एल गी 9 मई गी रोक्की दिता गेआ हा। बी.सी.सी.आई नै टूर्नामेंट दे बचे दे बाकी हिस्से आस्तै इक्क नमां कार्जक्रम जारी कीता ऐ जेदे मताबक मोहाली ते धर्मशाला च कोई मैच नेई होग।

<><><><><><>